

大方廣佛花嚴經 . 淨行品

佛馱跋陀羅譯

妙諦法音

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

大方廣佛花嚴經淨行品

爾時，智首菩薩問文殊師利言：佛子！

云何菩薩不染身口意業，不害身口意業，不癡身口意業，不退轉身口意業，不動身口意業，應讚歎身口意業，清淨身口意業，離煩惱身口意業，隨智慧身口意業？

云何菩薩生處成就，姓成就，家成就，色相成就，念成就，智慧成就，趣成就，無畏成就，覺悟成就？

云何菩薩第一智慧，最上智慧，勝智慧，最勝智慧，不可量智慧，不可數智慧，不可思議智慧，不可稱智慧，不可說智慧？

云何菩薩因力具足，意力具足，方便力具足，緣力具足，境界力具足，根力

具足，止觀力具足，定力具足？

云何菩薩善知陰界入，善知緣起法，善知欲色無色界，善知過去未來現在？

云何菩薩修七覺意，修空、無相、無作？

云何菩薩滿足檀波羅蜜、尸波羅蜜、羼提波羅蜜、毘梨耶波羅蜜、禪波羅蜜、般若波羅蜜、慈悲喜捨？

云何菩薩得是處非處智力，過去未來現在業報智力，種種諸根智力，種種性智力，種種欲智力，一切至處道智力，禪定解脫三昧垢淨智力，宿命無礙智力，天眼無礙智力，斷一切煩惱習氣智力？

云何菩薩常為諸天王守護、恭敬、供養；龍王、鬼神王、乾闥婆王、阿修羅王、迦樓羅王、緊那羅王、摩睺羅伽王、人王、梵天王等守護、恭敬、供養？

云何菩薩為眾生舍，為救，為歸，為趣，為炬，為明，為燈，為導，為無上導？

云何菩薩於一切眾生為第一，為大，為勝，為上，為無上，為無等，為無等等？

爾時，文殊師利答智首菩薩曰：善哉！善哉！佛子！多所饒益，多所安隱，哀愍世間，惠利一切，安樂天人，問如是義。

佛子！菩薩成就身口意業，能得一切勝妙功德；於佛正法，心無罣礙；去來今佛所轉法輪，能隨順轉；不捨眾生，明達實相；斷一切惡，具足眾善；色像第一，悉如普賢大菩薩等；成就如來一切種智；於一切法悉得自在，而為眾生第二尊導。

佛子！何等身口意業能得一切勝妙功德？

- | | | | | |
|---|------|------|------|------|
| ① | 菩薩在家 | 當願眾生 | 捨離家難 | 入空法中 |
| ② | 孝事父母 | 當願眾生 | 一切護養 | 永得大安 |
| ③ | 妻子集會 | 當願眾生 | 令出愛獄 | 無戀慕心 |
| ④ | 若得五欲 | 當願眾生 | 捨離貪惑 | 功德具足 |
| ⑤ | 若在妓樂 | 當願眾生 | 悉得法樂 | 見法如幻 |
| ⑥ | 若在房室 | 當願眾生 | 入賢聖地 | 永離欲穢 |
| ⑦ | 著寶瓔珞 | 當願眾生 | 捨離重擔 | 度有無岸 |

- | | | | | |
|---|------|------|------|------|
| ⑧ | 若上樓閣 | 當願眾生 | 昇佛法堂 | 得微妙法 |
| ⑨ | 布施所珍 | 當願眾生 | 悉捨一切 | 心無貪著 |
| ⑩ | 若在聚會 | 當願眾生 | 究竟解脫 | 到如來處 |
| ⑪ | 若在危難 | 當願眾生 | 隨意自在 | 無所罣礙 |
| ⑫ | 以信捨家 | 當願眾生 | 棄捨世業 | 心無所著 |
| ⑬ | 若入僧坊 | 當願眾生 | 一切和合 | 心無限礙 |
| ⑭ | 詣大小師 | 當願眾生 | 開方便門 | 深入法要 |
| ⑮ | 求出家法 | 當願眾生 | 得不退轉 | 心無障礙 |
| ⑯ | 脫去俗服 | 當願眾生 | 解道修德 | 無復懈怠 |
| ⑰ | 除剃鬚髮 | 當願眾生 | 斷除煩惱 | 究竟寂滅 |
| ⑱ | 受著袈裟 | 當願眾生 | 捨離三毒 | 心得歡喜 |
| ⑲ | 受出家法 | 當願眾生 | 如佛出家 | 開導一切 |
| ⑳ | 自歸於佛 | 當願眾生 | 體解大道 | 發無上意 |
| ㉑ | 自歸於法 | 當願眾生 | 深入經藏 | 智慧如海 |

- | | | | | |
|----|------|------|------|------|
| ②② | 自歸於僧 | 當願眾生 | 統理大眾 | 一切無礙 |
| ②③ | 受持淨戒 | 當願眾生 | 具足修習 | 學一切戒 |
| ②④ | 受行道禁 | 當願眾生 | 具足道戒 | 修如實業 |
| ②⑤ | 始請和尚 | 當願眾生 | 得無生智 | 到於彼岸 |
| ②⑥ | 受具足戒 | 當願眾生 | 得勝妙法 | 成就方便 |
| ②⑦ | 若入房舍 | 當願眾生 | 昇無上堂 | 得不退法 |
| ②⑧ | 若敷床座 | 當願眾生 | 敷善法座 | 見真實相 |
| ②⑨ | 正身端坐 | 當願眾生 | 坐佛道樹 | 心無所倚 |
| ③⑩ | 結跏趺坐 | 當願眾生 | 善根堅固 | 得不動地 |
| ③① | 三昧正受 | 當願眾生 | 向三昧門 | 得究竟定 |
| ③② | 觀察諸法 | 當願眾生 | 見法真實 | 無所罣礙 |
| ③③ | 捨跏趺坐 | 當願眾生 | 知諸行性 | 悉歸散滅 |
| ③④ | 下床安足 | 當願眾生 | 履踐聖迹 | 不動解脫 |
| ③⑤ | 始舉足時 | 當願眾生 | 越度生死 | 善法滿足 |

- | | | | | |
|----|------|------|------|------|
| ③⑥ | 被著衣裳 | 當願眾生 | 服諸善根 | 每知慚愧 |
| ③⑦ | 整服結帶 | 當願眾生 | 自檢修道 | 不壞善法 |
| ③⑧ | 次著上衣 | 當願眾生 | 得上善根 | 究竟勝法 |
| ③⑨ | 著僧伽梨 | 當願眾生 | 大慈覆護 | 得不動法 |
| ④⑩ | 手執楊枝 | 當願眾生 | 心得正法 | 自然清淨 |
| ④⑪ | 晨嚼楊枝 | 當願眾生 | 得調伏牙 | 噬諸煩惱 |
| ④⑫ | 左右便利 | 當願眾生 | 蠲除污穢 | 無姪怒癡 |
| ④⑬ | 已而就水 | 當願眾生 | 向無上道 | 得出世法 |
| ④⑭ | 以水滌穢 | 當願眾生 | 具足淨忍 | 畢竟無垢 |
| ④⑮ | 以水盥掌 | 當願眾生 | 得上妙手 | 受持佛法 |
| ④⑯ | 澡漱口齒 | 當願眾生 | 向淨法門 | 究竟解脫 |
| ④⑰ | 手執錫杖 | 當願眾生 | 設淨施會 | 見道如實 |
| ④⑱ | 擎持應器 | 當願眾生 | 成就法器 | 受天人供 |
| ④⑲ | 發趾向道 | 當願眾生 | 趣佛菩提 | 究竟解脫 |

- | | | | | |
|----|------|------|------|------|
| ⑤0 | 若已在道 | 當願眾生 | 成就佛道 | 無餘所行 |
| ⑤1 | 涉路而行 | 當願眾生 | 履淨法界 | 心無障礙 |
| ⑤2 | 見趣高路 | 當願眾生 | 昇無上道 | 超出三界 |
| ⑤3 | 見趣下路 | 當願眾生 | 謙下柔軟 | 入佛深法 |
| ⑤4 | 若見險路 | 當願眾生 | 棄捐惡道 | 滅除邪見 |
| ⑤5 | 若見直路 | 當願眾生 | 得中正意 | 身口無曲 |
| ⑤6 | 見道揚塵 | 當願眾生 | 永離塵穢 | 畢竟清淨 |
| ⑤7 | 見道無塵 | 當願眾生 | 大悲所熏 | 心意柔潤 |
| ⑤8 | 見深坑澗 | 當願眾生 | 向正法界 | 滅除諸難 |
| ⑤9 | 見聽誦堂 | 當願眾生 | 說甚深法 | 一切和合 |
| ⑥0 | 若見大樹 | 當願眾生 | 離我諍心 | 無有忿恨 |
| ⑥1 | 若見叢林 | 當願眾生 | 一切敬禮 | 天人師仰 |
| ⑥2 | 若見高山 | 當願眾生 | 得無上善 | 莫能見頂 |
| ⑥3 | 若見刺棘 | 當願眾生 | 拔三毒刺 | 無賊害心 |

- | | | | | |
|----|------|------|------|------|
| ⑥4 | 見樹茂葉 | 當願眾生 | 以道自蔭 | 入禪三昧 |
| ⑥5 | 見樹好花 | 當願眾生 | 開淨如花 | 相好滿具 |
| ⑥6 | 見樹豐果 | 當願眾生 | 起道樹行 | 成無上果 |
| ⑥7 | 見諸流水 | 當願眾生 | 得正法流 | 入佛智海 |
| ⑥8 | 若見陂水 | 當願眾生 | 悉得諸佛 | 不壞正法 |
| ⑥9 | 若見浴池 | 當願眾生 | 入佛海智 | 問答無窮 |
| ⑦0 | 見人汲井 | 當願眾生 | 得如來辯 | 不可窮盡 |
| ⑦1 | 若見泉水 | 當願眾生 | 善根無盡 | 境界無上 |
| ⑦2 | 見山澗水 | 當願眾生 | 洗濯塵垢 | 意解清淨 |
| ⑦3 | 若見橋梁 | 當願眾生 | 興造法橋 | 度人不休 |
| ⑦4 | 見修園圃 | 當願眾生 | 耘除穢惡 | 不生欲根 |
| ⑦5 | 見無憂林 | 當願眾生 | 心得歡喜 | 永除憂惱 |
| ⑦6 | 見好園池 | 當願眾生 | 勤修眾善 | 具足菩提 |
| ⑦7 | 見嚴飾人 | 當願眾生 | 三十二相 | 而自莊嚴 |

- | | | | | |
|----|------|------|------|------|
| ⑦8 | 見素服人 | 當願眾生 | 究竟得到 | 頭陀彼岸 |
| ⑦9 | 見志樂人 | 當願眾生 | 清淨法樂 | 以道自娛 |
| ⑧0 | 見愁憂人 | 當願眾生 | 於有為法 | 心生厭離 |
| ⑧1 | 見歡樂人 | 當願眾生 | 得無上樂 | 擔怕無患 |
| ⑧2 | 見苦惱人 | 當願眾生 | 滅除眾苦 | 得佛智慧 |
| ⑧3 | 見強健人 | 當願眾生 | 得金剛身 | 無有衰老 |
| ⑧4 | 見疾病人 | 當願眾生 | 知身空寂 | 解脫眾苦 |
| ⑧5 | 見端正人 | 當願眾生 | 歡喜恭敬 | 諸佛菩薩 |
| ⑧6 | 見醜陋人 | 當願眾生 | 遠離鄙惡 | 以善自嚴 |
| ⑧7 | 見報恩人 | 當願眾生 | 常念諸佛 | 菩薩恩德 |
| ⑧8 | 見背恩人 | 當願眾生 | 常見賢聖 | 不作眾惡 |
| ⑧9 | 若見沙門 | 當願眾生 | 寂靜調伏 | 究竟無餘 |
| ⑨0 | 見婆羅門 | 當願眾生 | 得真清淨 | 離一切惡 |
| ⑨1 | 若見仙人 | 當願眾生 | 向正真道 | 究竟解脫 |

- | | | | | |
|-----|------|------|------|------|
| ⑨2 | 見苦行人 | 當願眾生 | 堅固精勤 | 不退佛道 |
| ⑨3 | 見著甲冑 | 當願眾生 | 誓服法鎧 | 得無師法 |
| ⑨4 | 見無鎧仗 | 當願眾生 | 遠離眾惡 | 親近善法 |
| ⑨5 | 見論議人 | 當願眾生 | 得無上辯 | 摧伏外道 |
| ⑨6 | 見正命人 | 當願眾生 | 得清淨命 | 威儀不異 |
| ⑨7 | 若見帝王 | 當願眾生 | 逮得法王 | 轉無礙輪 |
| ⑨8 | 見帝王子 | 當願眾生 | 履佛子行 | 化生法中 |
| ⑨9 | 若見長者 | 當願眾生 | 永離愛欲 | 深解佛法 |
| 100 | 若見大臣 | 當願眾生 | 常得正念 | 修行眾善 |
| 101 | 若見城郭 | 當願眾生 | 得金剛身 | 心不可沮 |
| 102 | 若見王都 | 當願眾生 | 明達遠照 | 功德自在 |
| 103 | 若見妙色 | 當願眾生 | 得上妙色 | 天人讚歎 |
| 104 | 入里乞食 | 當願眾生 | 入深法界 | 心無障礙 |
| 105 | 到人門戶 | 當願眾生 | 入總持門 | 見諸佛法 |

- | | | | | |
|----|------|------|------|------|
| ⑩⑥ | 入人堂室 | 當願眾生 | 入一佛乘 | 明達三世 |
| ⑩⑦ | 遇難持戒 | 當願眾生 | 不捨眾善 | 永度彼岸 |
| ⑩⑧ | 見捨戒人 | 當願眾生 | 超出眾難 | 度三惡道 |
| ⑩⑨ | 若見空鉢 | 當願眾生 | 其心清淨 | 空無煩惱 |
| ⑪⑩ | 若見滿鉢 | 當願眾生 | 具足成滿 | 一切善法 |
| ⑪① | 若得食時 | 當願眾生 | 為法供養 | 志在佛道 |
| ⑪② | 若不得食 | 當願眾生 | 遠離一切 | 諸不善行 |
| ⑪③ | 見慚愧人 | 當願眾生 | 慚愧正行 | 調伏諸根 |
| ⑪④ | 見無慚愧 | 當願眾生 | 離無慚愧 | 普行大慈 |
| ⑪⑤ | 得香美食 | 當願眾生 | 知節少欲 | 情無所著 |
| ⑪⑥ | 得不美食 | 當願眾生 | 具足成滿 | 無願三昧 |
| ⑪⑦ | 得柔軟食 | 當願眾生 | 大悲所熏 | 心意柔軟 |
| ⑪⑧ | 得粗澀食 | 當願眾生 | 永得遠離 | 世間愛味 |
| ⑪⑨ | 若嚙食時 | 當願眾生 | 禪悅為食 | 法喜充滿 |

⑫0	所食雜味	當願眾生	得佛上味	化成甘露
⑫1	飯食已訖	當願眾生	德行充盈	成十種力
⑫2	若說法時	當願眾生	得無盡辯	深達佛法
⑫3	退坐出堂	當願眾生	深入佛智	永出三界
⑫4	若入水時	當願眾生	深入佛道	等達三世
⑫5	澡浴身體	當願眾生	身心無垢	光明無量
⑫6	盛暑炎熾	當願眾生	離煩惱熱	得清涼定
⑫7	隆寒冰結	當願眾生	究竟解脫	無上清涼
⑫8	諷誦經典	當願眾生	得總持門	攝一切法
⑫9	若見如來	當願眾生	悉得佛眼	見諸最勝
⑬0	諦觀如來	當願眾生	悉覩十方	端正如佛
⑬1	見佛塔廟	當願眾生	尊重如塔	受天人敬
⑬2	敬心觀塔	當願眾生	尊重如佛	天人宗仰
⑬3	頂禮佛塔	當願眾生	得道如佛	無能見頂

- ⑬④ 右遶塔廟 當願眾生 履行正路 究暢道意
⑬⑤ 遶塔三匝 當願眾生 得一向意 勤求佛道
⑬⑥ 讚詠如來 當願眾生 度功德岸 歎無窮盡
⑬⑦ 讚佛相好 當願眾生 光明神德 如佛法身
⑬⑧ 若洗足時 當願眾生 得四神足 究竟解脫
⑬⑨ 昏夜寢息 當願眾生 休息諸行 心淨無穢
⑬⑩ 晨朝覺悟 當願眾生 一切智覺 不捨十方

佛子！是為菩薩身口意業，能得一切勝妙功德。諸天、魔、梵、沙門、婆羅門、人及非人、聲聞、緣覺所不能動。

大方廣佛花嚴經淨行品

無上妙法喜見聞 讀誦修行為他說 福慧二嚴三障除 捨離眾惱成正覺

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地青山公路18號 mfbm.hk